

Zeike ! of gezeik ?

Oh oh . . . döör begint ij weer met zien aover niks.

Ken ie de uitdrukking nog, wöormèè de verandering in taolgebruuk wier an-egöven en doelend op de woordkeuze ? . . " *toen 't plassen pissen wier . . is 't gezeik begunnen !* "

Ikke wel en gebruke die ook iens, *te pas of te onpas*, as dät zo uutkump. Maer disse keer wi-k 't elemaole niet aover maotskappelijke irritasies ebben, maer èven een paer erinneringen opaelen veurdät die ongeneude gast as een Alois Alzheimer op bezuuk zol kommen en ikke mi'j gien veurstellink meer kanne maken van wöör die knakker 't aover ef.



Lopend deur de **veurmalige Waterstraote**, tans de **Pletterstraote**, viel mein oge op een stukken roestvast staol, dät as een skief driekien in een oek "**An de Stadsmure**" naobi'j '**t Pelserbruggien** is bevestigd. Ik wete wöör dät dink veur dienen, want 't is een uitvinding uut de verlèden tied en kanne mi'j de ölten veurlopers iervan nog wel erinneren.

Gelieke mos in an 't (verbods-)börtien denken die vrogger an **de Diekstraote** naost 't baduus ingen. As wi'j weer ies vanof "**Opoë Kappers**", die in de **Merelstraote** an de **Kamperpoorte** wonen, naor ons uus in de **Riouwstraote** liepen en een ummegien aover **de Bollebieste** of langes de **Achtergrachte** maakten, kwammen wi'j döör langes en vertellen mien va dät zi'j vrogger de letters wel iens adden veranderd.

Inplase van de bedoelde tekst " **VERBODEN HIER TE WATEREN** ", adden z'j stiekem de H as een B aover-e-skilderd. En dät wazzen now presies wat de zatlappen ier dejen as die weer vanuut de kroeg naor uus te mossen lopen.

OK . . in disse medärne tied zie-j dät soort (*verbods-*)börties niet meer. 't "**wildplassen**" is now bi'j wet verböden, maer and-aving is te duur . . dus ? Kump de Rova nao 't weekende in alle vrogte met de ogedrukspuite langes de bekende stadsdelen de zake skone maken.

Uut mien jeugd kenne ik nog wel de **openbaere waterplasen** die hier en döör in de stad stonnen. Van de stienen (betonnen) ökkies wöör ie acher kon staon zeiken,



Openbaere urinoirs, of in de volksmond gewoon "**zeik-ökkies**", gong ie allenig in a-j wel ärg oge nood adden, want meerendeels stonk 't döör zo allemachtig gasterig, dät oe 't pissen wel aovergonk.

Achter de **Grote-Kärke** ston eerder ook zo'n dink (*tegen de Kärke an zeiken mog niet . . en toch waren de muren altijd gruun*).



Een enkele keer kom ie der nog is iene tegen. Veural op plasen wöör de tied stille is blieden staon, maer in Zwolle ef ter zo'n medärne roestvaststaolen zuil estaon, wöör a-j met veer man tegelieke um-en kon staon.

Maer die is verplaats naor de **Lombardstraote** naost de **Weeme** en de onderdeurgank van 't **Stad-uus**.

Dät is veur mensen die met de (h)and-avink in anraking bint ekommen, danwel een bonne ebben ekrègen veur 't wildplassen, netuurlijk een symbolische anwiezink ieraover niet mutten kommen te zeiken.

Nao de leste anpassing van de bestroatink rondumme de **Luttekestraote** en de **Grote Kärke** stiet ter now een zeikbak die medärne tied voldut en wöör ie now met drie man um-en kunt staon, maer of dät now ook met dät iewige gezeik aover meer privacy te maken ef ??



Maer . . der stiet een pisebak ! . .

. . althans op momenten dät 't beleid dät toestiet teminste.



Want op een nörmale deurdewèèkse dag is dät dink, as bi'j teuverslag, iniens in de grond weg-ezakt en blief ie met 't water baoven de knieën staon.

Openbaere toiletten bint in Zwolle skienbaer wel anwezig (*een stuk of zeuven*) maer . . . **en döör e-j dät weer** . . . ier ebben der een appie op oe slimme tillefoon veur neudig umme die dingen in disse medärne tied te kunnen vinnen.

Oe slim bi-j dan . . a-j oe eigen ärsens niet iens weer maggen gebruiken ?

. . Wat een gezeik !



Ie kunnen oe netuurlijk ofvraogen wat dät metalen drie-ukien met dit ele verael aover geziek te maken ef, maer ie adden kunnen weten dät ik meistens op 't leste pas met een antwoord komme dus . . . *ier kump e an* . .

Dät simpele drie-ukien, dät in mien jeugd ier en döör nog een ölten plankien wazzen, . . . en wöörvan deur mien va de (uut-)wärling is uur-e-legd, is niks anders dan een . . . **Z.O.K !**

" Zeik oezelf in de klomp plankien! "

Ie ebben toch niet ärg völle fantasie neudig umme de uutwärling te kunnen begriepen.

17 augustus 2022

